

OMAR BIN PAIMAN
LWN.
NORAIDAH BINTI MD YUSOFF

[Mahkamah Rayuan Syariah Selangor Di Shah Alam, YAA Dato' Hj. Mohd Shukor Bin Sabudin (Pengerusi), YA Datuk Hj. Mohd Radzi Bin Hj. Abd Latif (Panel), YA Datuk Jasri @ Nasip Bin Mat Jakir (Panel), Pada 25 Jun 2021 bersamaan 14 Zulkaedah 1442H]

[Kes Permohonan No. : 10000-077-0111-2020]

[Permohonan Kebenaran Lanjut Tempoh Memfailkan Alasan Rayuan - Seksyen 238 Enakmen Tatacara *Mal* Mahkamah Syariah (Negeri Selangor) 2003]

Peguam Syarie Pemohon : tiada.

Peguam Syarie Responden : tiada.

ALASAN PENGHAKIMAN

[1] Kes ini adalah suatu permohonan untuk mendapat pelanjutan tempoh masa bagi memfailkan Alasan Rayuan di dalam kes rayuan yang difailkan oleh Pemohon pada 23 Januari 2020 bagi kes Rayuan (Mal) No.: 10000-017-0012-2020. Notis Rayuan telah difailkan oleh Pemohon terhadap keputusan YA Hakim Bicara Mahkamah Tinggi Syariah Selangor di Shah Alam yang diberikan pada 14 Januari 2020.

[2] Berdasarkan Afidavit Pemohon, Pemohon telah menerima Borang MS 30 pada 17 Ogos 2020. Pemohon mempunyai masa selama empat belas (14) hari dari tarikh penerimaan Borang MS 30 untuk memfailkan Alasan Rayuan yang mana tempoh tersebut berakhir pada 31 Ogos 2020 namun Pemohon telah gagal memfailkan Alasan Rayuan dalam tempoh yang ditetapkan. Permohonan pelanjutan tempoh masa ini difailkan oleh Pihak Pemohon pada 20 Oktober 2020 iaitu telah lewat selama **50 hari** dari tarikh yang sepatutnya.

[3] Responden tidak bersetuju dengan permohonan ini dan telah memfailkan Afidavit Jawapan pada 16 Disember 2020 manakala Pemohon telah memfailkan Afidavit Balasan pada 12 Januari 2021. Responden telah memfailkan dua (2) hujahan iaitu pada 17 Februari 2021 dan pada 1 Mac 2021 manakala Pemohon memfailkan hujahan pada 5 Mac 2021.

[4] Di samping itu, Pemohon juga telah memfailkan Afidavit Tambahan bertarikh 4 Mei 2021 manakala Responden memfailkan Afidavit Jawapan.

[5] Bagi maksud kelewatan tersebut, Pemohon menyatakan bahawa ia berpunca daripada perkara seperti berikut-

- i. Keputusan Mahkamah telah berlaku dalam tempoh pandemik Covid 19 iaitu perintah kawalan pergerakan (PKP) yang menyukarkan pergerakan;
- ii. Berdasarkan keratan akhbar bertarikh 16 Ogos 2020, maklumat daripada Kementerian Kesihatan Malaysia (KKM) melaporkan bahawa kes positif Covid 19 telah mencecah angka 9,200 dengan 125

kematian dan bilangan kes positif serta angka kematian ini mengakibatkan masyarakat berdepan kebimbangan, kesukaran dan ketakutan;

- iii. Ketua Hakim Syarie Jabatan Kehakiman Syariah Selangor juga telah mengeluarkan arahan penangguhan kes mulai 7 Oktober 2020 sehingga 9 Oktober 2020;
- iv. Pemohon adalah orang awam yang kurang pengetahuan berkaitan undang-undang dan proses menyiapkan permohonan rayuan memberikan tekanan emosi kepada Pemohon;
- v. Catatan Hakim Mahkamah Rendah Syariah bertarikh 20 Oktober 2011 menunjukkan bahawa Pemohon bersetuju melepaskan Responden dengan syarat gugur semua tuntutan Responden terhadap Pemohon kecuali nafkah anak-anak. Walaupun harta sepencarian tidak dicatatkan secara bertulis di dalam perintah Mahkamah sebagai tuntutan yang digugurkan tetapi apa yang dipersetujui oleh Pemohon mengenai semua tuntutan itu adalah termasuk harta sepencarian;
- vi. Pemohon juga turut mengendalikan kes secara sendirian kerana Pemohon tidak berkemampuan untuk mengupah peguam bagi mengendalikan kes bagi pihak Pemohon;
- vii. Pemohon tidak berkemampuan untuk membayar kerana Pemohon mempunyai tanggungan keluarga baru yang sedia ada sekarang dengan dua orang anak yang masih kecil dan isteri yang tidak bekerja;

- viii. Pemohon tidak mempunyai kenderaan lain yang memudahkan Pemohon untuk membawa anak kecil Pemohon ke klinik bagi mendapatkan suntukan imunisasi kanak-kanak dan menguruskan keluarga;
- ix. Pemohon juga mempunyai tanggungan nafkah anak sebanyak RM 750.00 setiap bulan, RM 600.00 setiap musim perayaan aidilfitri dan RM 900.00 setiap awal persekolahan anak-anak; dan
- x. Pendapatan yang tidak menentu menjadikan beban yang tinggi buat Pemohon untuk menampung kesemua tanggungan di bawah Pemohon.

[6] Pihak Responden di dalam Afidavit Jawapannya menyatakan seperti berikut-

- i. Bahawa tiada sebarang isu Pandemik Covid 19 sepertimana yang didakwa oleh Pemohon kerana Perintah Kawalan Pergerakan (PKP) bagi mengelak penularan wabak tersebut adalah bermula pada 18 Mac 2020 sedangkan keputusan kes yang ingin dirayu diberikan pada 14 Januari 2020 malah Pemohon telahpun memfailkan Notis Rayuan pada 23 Januari 2020.
- ii. Pihak Responden tidak dapat menerima alasan Pemohon terpaksa mengendalikan kes ini sendiri kerana kekangan kewangan. Ini adalah kerana Pemohon tidak dapat membuktikan dengan jelas akan ketidakmampuan Pemohon. Responden juga menyifatkan alasan

Pemohon tidak mampu kerana terpaksa menyara keluarga baharu amatlah tidak bertanggungjawab, memperalatkan perkahwinan baharu sebagai satu bebanan dan cubaan melarikan diri daripada tanggungjawab malah alasan ini tidak ada kaitan langsung dengan permohonan lanjut tempoh tersebut.

- iii. Responden juga mempertikaikan alasan Pemohon tiada kereta lain untuk membawa anak kecil ke klinik, Pemohon mempunyai tanggungan nafkah terhadap anak-anak dan pendapatan Pemohon yang tidak menentu sebagai tidak relevan dengan permohonan lanjut tempoh ini.
- iv. Responden menyatakan berdasarkan catatan Hakim Mahkamah Rendah Syariah Gombak Timur di dalam kes 10007-055-0677-2011 pada 20 Oktober 2011 menyatakan Responden sebagai Plaintiff hanya bersetuju untuk melepaskan hak-haknya terhadap nafkah iddah, mutaah, nafkah tertunggak dan hutang perkahwinan sahaja. Oleh itu harta sepencarian bukanlah termasuk di dalam hak yang dilepaskan oleh Responden dan oleh itu Responden berhak untuk menuntut harta sepencarian.

ULASAN MAHKAMAH RAYUAN SYARIAH

[7] Permohonan ini dibuat dengan merujuk kepada seksyen 238 Enakmen Tatacara *Mal* Mahkamah Syariah (Negeri Selangor) 2003 [ETMMS 2003] berkaitan kuasa Mahkamah untuk melanjutkan tempoh masa, iaitu -

Seksyen 238 - Memanjangkan Atau Memendekkan Masa

(1) Mahkamah boleh, atas apa-apa terma yang difikirkannya adil, melalui perintah, melanjutkan atau memendekkan tempoh yang dalamnya seseorang dikehendaki atau dibenarkan oleh Akta ini atau oleh mana-mana penghakiman, perintah atau arahan untuk melakukan apa-apa perbuatan dalam mana-mana prosiding.

(2) Mahkamah boleh melanjutkan apa-apa tempoh yang disebut dalam subseksyen (1) walaupun permohonan untuk mendapatkan pelanjutan itu tidak dibuat sehingga selepas habis tempoh itu.

[8] Permohonan Pemohon ini adalah mengenai pemfailan Alasan Rayuan berdasarkan peruntukan seksyen 141 ETMMS 2003 yang menyatakan sebagaimana berikut-

Seksyen 141. Alasan Rayuan

(1) Dalam masa empat belas hari dari tarikh penerimaan pemberitahuan di bawah subseksyen 139(6), perayu hendaklah mengemukakan alasan rayuan dalam lima salinan kepada Pendaftar Mahkamah yang terhadap keputusannya rayuan itu dibuat yang dialamatkan kepada Mahkamah yang mendengar rayuan itu.

(2) Tiap-tiap alasan rayuan hendaklah menyatakan dengan ringkas isi penghakiman yang dirayukan itu dan hendaklah mengandungi butir-butir yang jelas tentang undang-undang atau fakta-fakta yang mengenainya rayuan itu dibuat dan, kecuali dengan kebenaran Mahkamah yang mendengar rayuan itu, perayu tidak boleh dibenarkan semasa pendengaran rayuan itu bersandar kepada apa-apa alasan selain alasan-alasan yang dinyatakan dalam alasan rayuan itu.

[9] Sukacita kami nyatakan bahawa banyak penghakiman telah diputuskan berhubung dengan permohonan perlanjutan tempoh masa seperti kes *Sharifah Badariah Binti Mari lwn. Yasran Bin Hj. Hussain, Kes Permohonan No.: 10000-099-0005-2009* oleh Mahkamah Rayuan Syariah Negeri Selangor dan antara kes yang telah diterbitkan di dalam Jurnal Hukum seperti kes *Aziah Bin Abdul Aziz lwn. Azmi Bin Abd. Aziz [2013], JH 36(1)* serta kes *Fatima @ Hasnah Binti Daud lwn. Wan Hassan Bin Wan Daud [2015], JH 40(1)*, di mana Panel Hakim Mahkamah Rayuan kes-kes berkenaan telah menggariskan beberapa faktor yang perlu diberi pertimbangan sebelum membenarkan sesuatu permohonan di bawah seksyen 238 Akta 585 tersebut, iaitu-

- i. Tempoh kelewatan;
- ii. Sebab kelewatan;
- iii. Kebarangkalian untuk Pemohon berjaya dalam rayuannya (semakan);
- iv. Tahap prejudis kepada pihak yang satu lagi.

[10] Kami tegaskan di sini bahawa pematuhan kepada tempoh masa yang ditetapkan dalam ETMMS 2003 adalah suatu yang *fundamental* dan hendaklah dipatuhi dengan ketat oleh Perayu dan Responden di dalam mana-mana peringkat prosiding rayuan. Pematuhan ini akan memberi kesan dalam menentukan sama ada Mahkamah Rayuan Syariah boleh meneruskan prosiding untuk mendengar sama ada rayuan Pihak Perayu dan/atau Responden atau sebaliknya.

[11] Bagi kes permohonan ini, Pemohon tidak mendeposkan **tempoh kelewatan** pemfailan alasan rayuan tersebut, tetapi berdasarkan kepada Afidavit Pemohon kami mendapati Pemohon menerima Borang MS 30 pada 17 Ogos 2020 dan Pemohon mempunyai masa selama 14 hari untuk memfailkan Alasan Rayuan yang

mana tarikh akhir pemfailan Alasan Rayuan adalah pada 31 Ogos 2020. Pemohon memfailkan permohonan ini pada 20 Oktober 2020 iaitu berlaku kelewatan selama tempoh **50 hari**.

[12] Kami telah meneliti kertas kausa dan berdasarkan ekshibit OP-4 yang dilampirkan di dalam kedua-dua Afidavit Pemohon dan Afidavit Balasan Pemohon, kami mendapati Borang MS 30 bertarikh 17 Ogos 2020 telah diterima oleh Pemohon pada 26 Ogos 2020. Fakta ini diperkukuhkan lagi berdasarkan lampiran 4 di dalam Hujahan Responden iaitu surat daripada Pendaftar, Mahkamah Tinggi Syariah Selangor kepada Pemohon yang memaklumkan bahawa Pemohon dikehendaki memfailkan Alasan Rayuan dalam tempoh 14 hari dari tarikh penerimaan Borang MS 30. Pendaftar di dalam surat tersebut mengesahkan Pemohon telah menerima Borang MS 30 pada 26 Ogos 2020.

[13] Oleh yang demikian tarikh akhir Pemohon sepatutnya memfailkan Alasan Rayuan daripada 26 Ogos 2020 adalah pada 8 September 2020 dan bukannya 31 Ogos 2020. Sungguhpun begitu Pemohon masih terlewat selama tempoh **42 hari** apabila Pemohon memfailkan permohonan ini pada 20 Oktober 2020.

[14] Pemohon telah mengemukakan **alasan kelewatan** adalah kerana keputusan Mahkamah telah berlaku dalam tempoh pandemik Covid 19 iaitu Perintah Kawalan Pergerakan (PKP) yang menyukarkan pergerakan. Kami telah meneliti laman web rasmi Majlis Keselamatan Negara dan kami mendapati PKP telah dilaksanakan di seluruh negara mulai 18 Mac 2020 sehingga 3 Mei 2020. PKP telah digantikan dengan Perintah Kawalan Pergerakan Bersyarat (PKPB) mulai 4 Mei sehingga 9 Jun yang masih tidak membenarkan pergerakan rentas negeri. Walaubagaimanapun PKPB telah digantikan dengan Perintah Kawalan Pergerakan

Pemulihan (PKPP) mulai 10 Jun 2020 sehingga 31 Ogos 2020 dan dilanjutkan secara berperingkat dan bersasar mengikut negeri yang mana PKPP ini telah memberikan lebih banyak kelonggaran pergerakan.

[15] Melalui pemerhatian, kami dapati telah ada pemakluman dibuat oleh Jabatan Kehakiman Syariah Negeri Selangor melalui siaran Facebook Live Jakess dan laman web Jakess tentang waktu operasi di seluruh Mahkamah Syariah Negeri Selangor mulai 13 Mei 2020 dan kategori kes-kes yang boleh difailkan. Jakess juga telah mewar-warkan bahawa pelanggan boleh hadir sama ada dengan atau tanpa temujanji untuk mendapatkan perkhidmatan tertentu.

[16] Oleh yang demikian kami tidak dapat menerima kelewatan Pemohon memfailkan alasan rayuan ini yang sepatutnya difailkan di antara tarikh 26 Ogos 2020 sehingga 8 September 2020 atas alasan kerana PKP telah menyukarkan pergerakan. Ini adalah kerana mulai 10 Jun 2020 sehingga 31 Ogos 2020 PKPB telah digantikan dengan PKPP yang mana lebih banyak kelonggaran pergerakan telah diberikan.

[17] Kami telah merujuk kepada kes *Harun bin Abdullah lwn. Zainab binti Alina [1987] JH 2 (1)*, Panel Rayuan Mahkamah Syariah Selangor berkenaan perihal istimewa yang perlu dikemukakan bagi pelanjutan tempoh masa iaitu –

“ Oleh itu sebelum kebenaran diberi untuk melanjutkan masa rayuan dua perkara hendaklah dipenuhi. Yang pertama mesti ada perihal-perihal istimewa (special circumstances), dan yang kedua, perihal-perihal istimewa itu akan mendatangkan atau membawa keadilan ”

[18] Kami perturunkan beberapa kes pelanjutan tempoh masa yang telah diluluskan setelah Pemohon berjaya membentangkan perihal-perihal istimewa tersebut seperti di dalam kes *Juwita binti Zainal Abidin lwn Mohd Bakhtiar bin Omar, Kes Permohonan No.: 10000-077-0040-2020* yang diputuskan pada 7 Ogos 2020 iaitu “ *Berdasarkan penelitian yang dibuat, kami dapati bahawa alasan yang dikemukakan oleh Pemohon terhadap kegagalan memfailkan dan menyerahkan Rekod Rayuan ini adalah disebabkan wujudnya Perintah Kawalan Pergerakan yang berkuatkuasa ketika itu. Sepatutnya pemfailan Rekod Rayuan dan serahan Rekod Rayuan hendaklah disempurnakan sebelum atau pada 24 Mac 2020.* ”

[19] Manakala bagi Kes Permohonan *No.: 10000-077-0002-2019 di antara Mat Jusoh bin Daud lwn Rohani binti Mohd Ali* yang diputuskan pada 31 Januari 2020, perihal istimewa yang dikemukakan oleh Pemohon bagi permohonan pelanjutan tempoh masa untuk memfailkan Notis Rayuan Balas adalah kerana Pemohon menerima Notis Rayuan ketika Pemohon berada di Lapangan Terbang Antarbangsa Kuala Lumpur, sedang menunggu penerbangan untuk menunaikan umrah. Sekembalinya Pemohon dari mengerjakan umrah selepas 11 hari kemudian, Pemohon tanpa kelengahan yang tidak patut telah mengambil tindakan yang sewajarnya untuk memfailkan permohonan pelanjutan tempoh masa.

[20] Oleh yang demikian di dalam kes ini kami berpuashati bahawa Pemohon telah gagal mengemukakan kepada kami **perihal yang istimewa** dan perihal yang membawa keadilan bagi kami membenarkan permohonan pelanjutan tempoh masa ini. Kelewatan tanpa alasan yang munasabah dikemukakan ini merupakan suatu tindakan melengah-lengahkan masa. Pada hemat kami tindakan melengah-lengahkan masa ini telah menyebabkan berlakunya kecuaiian melampau (*gross negligence*) dan ianya secara tidak langsung telah memprejudiskan hak Responden

sepertimana prinsip yang telah digariskan oleh panel Hakim Mahkamah Rayuan Syariah Negeri Selangor di dalam kes *Jamilah Binti Mohd Jali lwn. Mohd Ridzuan Bin Lop Zainal Rashid*, Kes Permohonan No. : 10000-077-002-2016, yang telah memutuskan-

“Kegagalan untuk memberikan sebab kelewatan telah menyebabkan hanya satu kesimpulan boleh dibuat iaitu Pemohon sengaja melengah-lengahkan rayuannya. Jika kecuaiannya seumpama ini dimaafkan pasti akan memberi gambaran bahawa prosedur dan kehendak undang-undang yang telah diperundangan dan ditetapkan tidak mempunyai nilai dan boleh diabaikan dengan sewenang-wenangnya. Apabila kelengahan itu disengajakan, maka faktor-faktor lain tidak mampu untuk mengimbangkan permohonan Pemohon”

[21] Prinsip tidak boleh sengaja melengah-lengahkan ini juga ada dalam nas Hukum Syarak, iaitu tidak boleh melengah-lengahkan penyelesaian tuntutan Pihak Plaintiff atau Pihak Yang Menuntut. Kami merujuk kepada kitab ***Mughni Muhtaj***, Cetakan Pertama: Lubnan (199) Jilid 4, hlm. 621-

وإذا استمهل ليأتي بدافع أمهل ثلاثة أيام

Maksudnya: “Dan apabila pihak yang kena tuntutan meminta tangguh untuk mendatangkan keterangan penolakan, maka diberi tangguh selama 3 hari.”

[22] Manakala dalam kitab ***al-Muhazzab***, Lubnan: Dar Al-Kutub, Cetakan Pertama, Jilid 3, Hlm. 396 diterangkan sebab kenapa tidak boleh diberi masa yang lama kepada pihak Defendan atau pihak yang kena tuntutan sebagaimana yang berikut-

والفرق بينه وبين المدعى عليه حيث قلنا أنه لا يترك أكثر من ثلاثة أيام أن يترك المدعى عليه يتأخر حق

المدعى الحكم له ، ويترك المدعى لا يتأخر إلا حقه

Maksudnya : “Dan perbezaan antara yang menuntut dan yang kena tuntutan di mana kami berpendapat bahawa pihak yang kena tuntutan tidak boleh meninggalkan (untuk mengemukakan bayyinah atau bersumpah) lebih dari tiga hari (kerana) ia melewati penyelesaian kes pihak yang menuntut. (Berbeza) dengan peninggalan lebih dari tiga hari oleh pihak yang menuntut (untuk mengemukakan bayyinah atau bersumpah), ia hanya melewati penyelesaian hak yang dituntutnya sendiri.”

[23] Berdasarkan rujukan tersebut tersebut, boleh disimpulkan semua kelengahan tidak boleh dibenarkan, kecuali ada keuzuran yang tidak dapat dielakkan. Sukacita kami nyatakan bahawa pertimbangan terhadap permohonan ini hendaklah diimbangi dengan alasan yang **relevan** dan **munasabah** sahaja. Bagi permohonan ini, kami dapati Pihak Pemohon telah gagal mengemukakan sebarang alasan yang **relevan** dan **munasabah** bagi kelewatan tersebut berlaku.

[24] Memandangkan kebenaran lanjut tempoh masa ini adalah bergantung kepada alasan-alasan yang dikemukakan dan berdasarkan alasan-alasan yang telah dikemukakan oleh Pihak Pemohon, kami dapati bahawa tiada satu alasan pun yang **relevan** dan **munasabah** untuk dipertimbangkan bagi permohonan perlanjutan tempoh.

[25] Kami berpendapat bahawa ulasan terhadap tempoh masa dan alasan perlanjutan tempoh masa ini sudah mencukupi untuk kami putuskan permohonan ini, tanpa perlu kami mengulas berhubung dengan isu kebarangkalian untuk Pemohon berjaya dalam rayuannya dan isu tahap prejudis kepada pihak yang satu lagi.

[26] Oleh yang demikian, kami berpendapat bahawa permohonan ini adalah tidak wajar untuk dibenarkan.

[27] Selanjutnya bagi kes permohonan ini, kami dapati bahawa Responden memohon supaya kes ini ditolak dengan kos sebanyak RM10,000.00. Dalam mempertimbangkan isu kos, kami merujuk kepada penghakiman Mahkamah Rayuan Syariah Negeri Selangor dalam kes *Ahmad Azman bin Abdullah lwn. Nor Fatiha binti Mohd Yusof*, Kes permohonan No.: 10000-085-0076-2018 yang menyatakan –

“ Pada hemat kami dalam isu kos ini, kami berpendirian bahawa suatu kos wajar diawardkan bagi mana-mana permohonan interlocutori perlanjutan tempoh masa di bawah seksyen 238 ETMMSS 2003. Kewajaran kos tersebut adalah diawardkan kepada Responden dalam semua hal prosiding permohonan perlanjutan tempoh masa tersebut berdasarkan pertimbangan-pertimbangan berikut –

- a. ...
- b. *Bahawa pihak Responden telah dijadikan pihak-pihak dalam prosiding permohonan perlanjutan tempoh masa tersebut yang menyebabkan pengeluaran kos di pihak responden dalam pengendalian prosiding dan guaman (jika ada) bagi menghadapi permohonan Pemohon;*
- c. *Bahawa pihak Responden terpaksa memberi penumpuan kepada prosiding permohonan perlanjutan tempoh masa melibatkan pengurusan pliding bermula dari penelitian terhadap Notis dan Afidavit Sokongan, penyediaan Afidavit Jawapan, penelitian kepada Afidavit Balasan serta penelitian dan penyediaan peringkat hujahan;*

- d. *Bahawa masa yang diperuntukkan oleh Responden untuk kehadiran prosiding permohonan perlanjutan tempoh masa di mana sekurang-kurangnya ia melalui 2 kali pendengaran atau lebih sebelum permohonan tersebut diputuskan; dan*
- e. *Bahawa mahkamah telah memberikan pertimbangan tahap prejudis kepada Responden dengan prosiding permohonan perlanjutan tempoh masa yang wajar dipampaskan dengan kos.*

[28] Berdasarkan rujukan kes tersebut, kami berpuas hati menyatakan bahawa Responden sewajarnya diberikan dengan kos prosiding atas permohonan yang dibuat oleh Pemohon ini.

KEPUTUSAN

SETELAH meneliti Notis Permohonan, Afidavit Sokongan, Afidavit Tambahan, Afidavit Jawapan, Afidavit Balasan dan Hujahan Pihak-Pihak, **MAKA KAMI** sebulat suara memutuskan sebagaimana yang berikut—


- [1] Permohonan Pihak Pemohon **ADALAH DITOLAK.**
- [2] Mahkamah perintahkan Kes Rayuan No.: 10000-017-0012-2020 **DIBATALKAN.**
- [3] Mahkamah perintahkan Pemohon membayar kos prosiding kes ini kepada Responden sebanyak RM 1,000.00.

Dibaca dan ditandatangani oleh:-



-
- 1. **YAA DATO' HJ. MOHD SHUKOR BIN SABUDIN**
Pengerusi Panel Hakim Mahkamah Rayuan Syariah Selangor


Dipersetujui oleh:-



2. **YA DATUK HJ. MOHD RADZI BIN HJ. ABD LATIF**

Panel Hakim Mahkamah Rayuan Syariah Selangor

Dipersetujui oleh:-



3. **YA DATUK JASRI @ NASIP BIN MAT JAKIR**

Panel Hakim Mahkamah Rayuan Syariah Selangor

